

Svi za jednoga i jedan za sve

Bosanskohercegovačko tripartitno Predsjedništvo, koje će u ponedjeljak održati inauguralnu sjednicu, bio je kompleksan odgovor na kompleksan izazov koji funkcionira dobro kada njegovi članovi ne predstavljaju samo one koji su glasovali za njih nego sve građane, Visoki predstavnik i Posebni predstavnik EU, Christian Schwarz-Schilling, piše u svojoj redovitoj novinskoj rubrici.

“Kada jeste uspijevalo, ono je stvaralo snažno i nepristrasno prisustvo putem koga je branilo interese građana u samom srcu političkog procesa, istovremeno predstavljajući i zastupajući građane Bosne i Hercegovine na adekvatan i dostojanstven način na državnim i međunarodnim događajima”, Visoki predstavnik i Posebni predstavnik EU piše u članku koji je danas objavljen u Dnevnom avazu, Nezavisnim novinama i Večernjem listu.

“Kada nije uspijevalo”, upozorava gosp. Schwarz-Schilling, “ono je narušavalo vjeru građana u politički proces na domaćem planu, te je dovodilo u pitanje sposobnost predstavnika Bosne i Hercegovine da predstavljaju zemlju na međunarodnoj sceni”.

“Način na koji Predsjedništvo može postići uspjeh je jasan”, piše Visoki predstavnik i Posebni predstavnik EU. “Ono dobro funkcionira kada njegovi članovi poštuju svoju formalnu obavezu da predstavljaju sve građane, a ne samo one koji su glasovali za njih”.

Gosp. Schwarz-Schilling piše: “Kao što je svima poznato, tri člana predsjedništva dolaze iz tri konstitutivna naroda. Ono što je manje poznato, međutim, je činjenica da oni ne predstavljaju konstitutivne narode kao takve. Predsjedništvo i njegovi članovi predstavljaju, i rade u ime, cijele zemlje”.

“Institucija je postizala neuspjehe, i zbog toga dolazila na loš glas, kada su njezini članovi postajali pobornici jednoga

ili drugoga konstitutivnog naroda. Dobro je funkcionirala kada su njezini članovi radili složno kako bi osigurali korist za cijelu zemlju”.

Visoki predstavnik i Posebni predstavnik EU jasno je rekao da očekuje od trojice novih članova Predsjedništva – Željka Komšića, Nebojše Radmanovića i Harisa Silajdžića – da se angažiraju u radu na zajedničkom dobru. I završio je poželivši im sreću.

Puni tekst tjedne rubrike koju piše Visoki predstavnik i Posebni predstavnik EU nalazi se na adresi www.ohr.int.